



滇臺行稿卷之四

雲南等處提刑按察司為議節里甲支銷舊規以
一政體以恤民瘼事該本司掌印按察使徐會
同布政司掌印左布政使鄔守巡驛傳等道左

叅政朱右叅政莫副使陳右叅議曾愈

事楊照得昆明縣設四省城九里甲地方如石

鼻普坪斑莊黑林沙浪吉回橋大小河浪羊烏場官

渡舊門溪大卜自小卜自板橋日苴春登耳琮和

等一十六里散住在鄉俱係著名版籍親身門戶

者其致恩一致恩二利城一利城二止善一止善

二止善三止善四止善五止善六等十里住居在

城俱係慣入衙門傭身包攬已上里甲大率有二
曰版籍之里甲乃鄉屯之淳民曰包攬之里甲乃
衙門之積棍爲國恤民者當以鄉之版籍小民
爲主而不當信憑城市包攬積棍之輩以虧削小
民脂膏此正法也查得嘉靖三十九年內議將該
縣里甲徵銀支銷原議所謂民瘼當詢諸里甲然
必里甲正身親當又親自開報而後其言可信殊
不知該縣之民散處村落夷獮鄉愚目不知書不
能應役一遇役臨卽憑在城積年包攬代當恣其
愚弄科害使縣官代受苛擾之名而鄉民坐致凋
瘵之苦良有以也旣議徵銀立法輸納僉立老人

照欵支銷則包當之弊除科歛之害革民無偏累
而獲安事有衙規而不擾其法已善可垂久矣夫
何越未數年該縣前項積戀包攬棍徒欲復開科
派之端以圖掩擾害之過捏稱支銷累及老人莫
若親當爲便遂令積棍竦告在官扶同代申竟廢
支銷之良議復拘里中以親當其流之弊不可勝
言緣在鄉里甲皆夷獮愚民素不出見官鮮能親
身應役間或一二親當則官吏乘其愚而非理濫
派市井欺其愚而多索價銀又加兜攬之積棍多
端恐嚇催辦之積皂百計需求致使愚民日被科
害莫措手足萬不得已授諸積棍代爲包攬是名爲

親當而定未嘗親當也且計包當之害尤甚於官吏侵漁之多蓋里甲親當則出之在民供之在官者原無定數使官不自愛於額外濫科包棍網利歷歷備奉私向里甲動以十年九空爲辭輒肆指一派十之蠹夷民旣不出官不知丁糧該納之數只得任其多派屈爲隱忍雖給循環以登記乃又儗手於吏書必稟縣官逐一查閱然後登註非里甲所能擅一筆者卽其稟閱之間一切非理非公之派盡被筆削是名爲登記而實未盡登也上不知濫科之蠹下莫伸困苦之寃其弊窟滋深而莫之省恤也本司查得先年舊議書冊計該縣一年之

費共該用銀二千二百六十三兩有零卽以此數派之該縣稅糧約有六千餘石以六百石編當一年則每石徵銀三兩七錢足矣今審見年里甲每糧一石出銀至十餘兩甚至三四倍焉况復有人丁准糧出辦乎緣該縣里甲舊規輪以一甲應當一年則各甲丁糧有多寡故編銀有輕重而甲首一有偏累之難也及吊查該縣官票每支銷甲首一名派有五六十票中間該正辦者不過數票餘皆無名之費可不痛哉逮查整辦公宴酒席自有牛稅等銀動支而該縣却有令里甲買辦者則所徵牛稅不知作何下落其奉上司牌票動支官銀買

辦公禮而該縣亦有令里甲出銀者則所徵官銀不知作何支銷蓋爲攬棍營利以播弄官吏朦蔽以浸漁故也夫攬棍旣遂其奸官吏又滿其慾則子民膏髓豈不浚竭耶爲照里甲之設專爲催辦錢糧勾攝公事而分派供辦已非正差今旣取供衙門諸費乃不得已之計爲民牧者正宜存心節愛視之惟恐有傷可也今乃濫費無經千瘡百孔致使困累日增民安得不貧且盜乎近日所獲盜賊多係鄉下貧民審厥所由類以差繁則民貧民貧則盜起理勢固然也已上究其弊源皆由于審編丁糧不得其均平里甲支銷不得其撙節耳近

該本司查將舊書冊內冗役冗費數事會議詳允裁革約省銀幾及千兩而所編丁糧差銀又得於三兩七錢內遞減矣其於丁糧支銷大壺若不亟爲議處示畫一之規溥節省之惠以裁省撫恤之誠恐民瘼至極激成閭閻之患殊不可測近該分守安普道左叅政朱 議允將所屬州縣里甲通令徵銀官當支銷甚爲民便但丁糧編派不均而支銷欸目不爲詳加酌議規畫妥當未免輕重懸殊徵支無緒出入難稽相應通行查議均派丁糧據事立欸因時酌定以蘇民困合候詳允本司備行雲南府掌印官督同昆明縣掌印官速將該縣

里甲除節奉勸合減革外查照舊刻書冊逐一參酌從長計議其要在十甲編糧欲其均平官當支銷欲其有節而已蓋各甲編糧若多寡不均其間奸頑有力者預爲躲閃糧多甲分則編糧愈輕甚至至有影射空閑別甲得以買脫倖免者誠實無力者任憑攤派糧少甲分則編糧愈重甚至有差重累貧產罄人逃而糧額獨累里甲賠賤者今必先將槃縣二十六里丁糧從公清審定列等則不必拘定甲額以致各甲糧多則編輕糧少則編重使有詭寄偏累不均之苦哀多益寡通融均爲十段每年輪編一段仍查舊議書冊款內將本司近

允革七事先行裁去其餘款日因時酌定更削虛費之餘只存實用之數對款條各分別一年一用者該若干二年三年五年一用者各該若干總計一年實該用銀若干乃將該甲值年一段之丁糧通融均派要見一段本甲人丁上中下丁各該若干上丁應幾丁准糧一石中丁下丁各應幾丁准糧一石三等入丁共該准糧若干每石編銀若干共該銀若干本甲稅糧共有若干每石編銀若干共該銀若干以上丁糧通共編銀若干以足前項該徵歲支之數類造成冊逐戶編給由帖以時追徵照款支銷甲首銀完卽放歸農業不必拘繫在

官用茲科擾其官當支銷人役作何僉選出納官
銀作何稽察循環文簿作何登記查考仍加博訪
民情議處詳當開具書冊作速呈報二司并守巡
該道以憑會議通詳施行務俾法立弊絕財省困
甦毋拘舊套毋厭周詳必求官民兩便經久可行
本司仍通行守巡兵備等道轉行所屬府州縣衙
門通將里甲支銷事宜各因地之衝僻事之繁簡
裁酌停當一體開立條件對款登答簿造書冊各
另呈詳候兪刊布遵守求爲定規惟復別賜定奪
令就通行呈請爲此奉

巡撫陳 批里甲受供輸之困胥緣牧官味節愛

之方汚吏恣需索之慾積棍營包攬之利以致糜
費支銷無藝而且丁糧審編不均剝截元元民窮
盜起職此之由該司此議悉得裨弊蘇民良法克
此而惠洽邊疆豈小補之哉如擬通行守巡兵備
各道一體留心督屬裁酌開款登答各另詳奪用
徵經濟此繳又蒙

巡按田 批會議詳悉痛洗民瘼刊刻成書頒布
槩省未爲遵守庶事體歸一而上下胥有所憑據
矣豈止一民一處一朝一夕之利賴哉俱如議行繳

雲南等處提刑按察司爲慎轉詳以申法紀以重
民命事照得本司轉詳死罪重犯例該有行該道

及按屬有司衙門鞫究情罪允當依律問擬具招
通呈

撫按衙門詳允覆經 按院會審情真無枉方抄
原問成獄始末招由於各道則移關於府州縣則
申呈俱到本司覆詳無異照例轉呈 都察院叅
詳明白送大理寺覆詳合律奏奉

欽依處決此一定之法也遵行在卷近本司查得按屬
各衙門凡問重辟內有原未具招呈詳 按院詳
示但蒙 本院按臨會審案開情真卽呈本司轉
詳者又有止呈
按院詳允不呈

撫院批示遽呈本司轉詳者甚至有併

兩院俱未詳允輒呈本司轉詳者以致於例有碍
遂蒙大理寺評駁如嘉靖四十等年臨安府斬罪
犯人丁珮雲南府斬罪犯人刻納等俱未經

兩院詳允遽呈本司轉詳致蒙駁回是也况成獄
重犯未奉決單者倘有寃情訴蒙

撫按兩院准理或遇會審駁問俱得徑自申豁若
一經轉詳奉有決單之後中間或有一線之寃問
官雖察知其枉多泥成案爲已奉決單而不肯爲
之申雪果有矜疑於法必經再奏然後辯釋似於
積寃難白尤於事體未便及查節奉決單勘合內

開先曾類奏奉有

欽依處決未報及雖奏訴有詞而情犯真實再行會審別無冤枉者臨期通卽押赴市曹依律處決照例施行事畢將處決過緣由一併具

奏覆審之日中間果有冤枉實蹟相應辯問并情罪有可矜疑者俱暫免行刑具實奏

請定奪其有近該審錄等官開奏情可矜疑者亦暫免行刑監候明文至日施行等因蓋為民命攸關恐有遺寬臨刑尤加覆審若微有矜疑卽緩刑以待反覆推察必求情真罪當然後刑之于市與眾棄之用示懲戒古人云求其生而不得則死者與我

皆無憾矣故古有三宥之法我

朝有三覆奏之典誠慎重民命意也此於轉詳深宜致慎合候詳允備行守巡兵備等道通行所屬府州縣等衙門遵照今後凡問死罪人犯俱要鞠出真情如係強盜得財必須失主面質真贓見証或曾殺傷人亦要被害被傷之家親面審驗是實如係謀故鬪毆殺人必須初覆檢驗傷痕無異及証佐供招明白追出行兇器仗比對傷痕相同本犯輸服無詞方可依律擬罪通呈

撫按衙門俱批詳允仍候

按院會審情真者方許呈報本司轉達京詳內有

情可矜罪可疑及曾經 兩院批駁并各司道駁
行再問如強盜有賊無証有証無賊及雖有賊而
失主未經認明者如人命初覆檢驗屍傷不同証
佐執詞反覆不一與凡一應問擬死罪人犯中間
有涉曖昧矜疑情節俱候再問明的覆呈
撫按衙門俱允仍載候

按院會審情真無枉方許呈報本司照例轉詳不
得拘執已見輕率斷決織成疑獄亦不得將未經
撫按兩院詳允及矜疑再問人犯雖奉詳允未經
會審及會審駁行再問未經覆呈允示者一槩呈
司轉詳致煩評駁未結各屬衙門務遵前議施行

敢有如前雲南臨安各府屬呈報犯人丁漏刻納
等違錯者聽本司查究輕則提吏問罪重則併官
參呈庶法體安當而京詳免於駁勘刑獄明允而
民命保於慎重其於三省三覆之 恩意亦遠被
於遐荒矣緣係慎轉詳以申法紀以重民命事理
本司未敢擅專合就通行呈請為此奉

巡撫陳 批各衙門斷獄通詳 兩院自有定規
近閱諸牘間多違錯殊乖法體至於初鞫重犯未
得真情輒便轉詳矜疑駁問猶懷顧忌竟未辯理
改正非所以體

欽恤而重民命也該司此議具見申明法守詳慎刑獄

之意如擬通行各道及軍衛有司自後凡問死罪人犯俱要鞠出真情贓伏証佐明白方許休律擬罪通詳其有究抑務要虛心參審毋泥成案毋執獨見毋徇舊嫌據實詳奪若知其枉而不與辯及輕率剖決以致故入人罪者悉照律例參究此繳蒙巡按田 批據議足見明慎用刑之至意也俱如擬備行各道并府州縣查照施行繳

○雲南等處提刑按察司爲地方警急事本司呈安置土婦鳳索林并議處鳳曆事由查得土婦鳳索林原蒙安置省城城隍廟街住宅四圍蓋僻隣佑曠散不便關防相應行昆明縣動支官銀另買住

近街市人烟稠密去處房屋一所安置本婦以便防範仍於都司選取軍人十名責令的當官一員統率每日輪流防守不許武定夷羅私通傳遞朔望日期責令赴司呈遞其結查考仍行武定府嚴諭彼處夷民不許潛赴省城與本婦交通如有奸細窺探擒解到司以法究詳重治本婦所用婢婦仍行該縣查點堪用者止留四五人聽其使喚餘皆發回該府責令鄭韶等管束以杜往來各將留用并發回各口呈報查考其六門守把移行都司出示諭令各官軍遵照嚴加盤詰不許故縱面生反人出入探聽用嚴門禁仍行戒諭本婦不許聽

信陰謀主撥啓惹釁端自干

國家重典其原居房屋併行昆明縣公議價值變賣
還官以充新買價數倘彼此房價內有不敷另呈
補足如或有餘亦聽還官作正完日呈報庶內釁
既弭外患可杜而於地方永有攸賴矣再照鳳曆
逆賊乂蓄奸謀敢彰逆狀已經首縛自後

憲典外除防禦事宜該府近議設木城等八條通詳另
行外其目前急務所當舉行者有三其一謂寬脅後
以安人心蓋曆賊糾集夷羅數多黨助剗營負固
拒傷官兵罪不容誅既經擒元惡斬獲後級其
餘黨類多係夷羅愚人一時聽信隨後罔知利害

若復以搜山爲名窮支極黨未免延蔓無辜愈滋
驚擾相應行府出示曉諭前項餘黨夷人悉聽改
過自新散歸農業姑免追究以開生全之路庶反
側自安人心帖服其二謂明賞功以示激勸夫賞
不踰時欲人速得爲善之利在兵法皆當信賞以
示勸而况該府爲新造之邦甫定之衆遇此逆醜
不旋踵而成功該府調度經畫之功於是首著而
鄭韶張順等戮力奮勇親冒矢石其功誠可嘉尚
相應行該府將獲功官兵作速查明分別等第呈
報前來卽於布政司庫貯官銀動支照依該府原
懸賞格重加優賞俾賞勸旣明人心鼓舞內有應

議罪者亦聽該府勅明懲戒一二俾知軍律有紀
焉其三謂杜勾引以絕禍源大禍皆起於初萌法
當嚴於濟惡故勾引之患不可不嚴為之防也訪
得曆賊素以安國亨為暗援遙張聲勢陰助羽翼
故其敢於倡亂者蓋恃力於假手亦藉口於遠交
也今據該府報稱審得鳳曆五日之前徑差黨惡
吳景和段友紀前去水西安家私相謀議借錢糧
兵馬等項志不在小茲幸鳳曆成擒內亂已銷但
與水西相約外患可虞等因似有的據相應乘此
亂機已昭之時嚴加禁諭請乞 本院移牒貴州
撫兩院及行建昌畢節等道嚴為戒諭土官安國

亨不許指倚私交邀結助逆自干

國法倘有夷兵過江階禍啓釁貽害地方卽從重究
治仍取安國亨不致勾引其結通行呈報備查庶
禍本可塞而凡假托聲援同惡相濟者自不得不
歛戢矣候詳兇日備行都司并武定雲南府昆明
縣一體遵照施行惟復別賜定奪合就通行呈請
為此奉

巡撫陳

批據議防夷婦以息主謀嚴門禁以杜

奸宄寬黨與以安反側明賞罰以勵人心禁土酋
以塞外釁機宜悉中經畫無遺俱如擬行繳又蒙
巡按田 批看得所議咸為先事之慮也除第三

件本院徑移文貴州外餘如擬行此正所謂集思
廣益有裨於地方者多矣此繳又奉

總兵沐 批據議最當安國亨除會移文戒諭外
餘依擬施行繳

雲南等處提刑按察司爲酌議米價以免虧累事
會議嵩明州米價緣由議得先年派收白米於雲
南府屬州縣起運雲南府廣備倉本色紅米內各
州縣每石抽收六升惟富民縣原以地產俱徵糯
米今改紅米其價較輕故每石抽收一斗共該白
米一千二十石每石折銀一兩二錢以供

軍門隨朝食米并三司官員俸給以是定規向以

缺官空月支剩又爲別項那借動用今該府以近
添參將等官每年無闕該俸米一千五十石而派
收各州縣米止共六百九十七石零尚不敷米四
百三十九石查得六百九十七石之數乃隆慶二
年奉例減徵以致白米亦隨減少此後全徵又復
原派之數則雖添有參將等官較之俸米往年空月
支剩即可通融亦足支應不必加派仍應照舊各
州縣每石止抽白米六升富民縣每石止抽一斗
專備支送俸米不許別項借支惟是原議俱徵折
色欲于省市易買又恐擾累舖戶乃各捐俸銀票
行嵩明州產米地方照值買解本以省會城舖行

易買之擾初不意迄今反爲嵩明一州偏累之害
今據該府酌擬本折兼收以免于嵩明州及省城
行戶幫累則于民不加賦而于事無偏擾官司免
出銀易買之煩舖戶省合力賠累之苦相應呈請
合候詳示備行雲南府轉行各州縣遵照自隆慶
四年爲始將每年本司會計坐派起運廣備倉秋
糧內照今議定嵩明安寧等九州縣每石抽收白
米六升內收本色米一升五合折色銀米四升五
合其富民一縣每石抽收米一斗內抽本色米二
升五合折色銀米七升五合其本色各州縣俱要
上好熟米運赴廣備倉不許揀和糠粃濕爛該府

仍置官印升斗一付發倉收量每米一石帶耗三
升另覈收貯按月支送各員應用折色銀兩每石
仍收銀一兩二錢類解府庫另匣收候按月分送
如有陞遷等項支剩之數相接搭解仍於原議循
環內明白填報查考不許別項挪移動支以致又
稱不敷及經收人員侵冒等弊從重察治以後年
分有閏無閏悉照今議施行立爲一定之規庶里
甲行戶均免擾累在官在民兩得便益矣照詳施
行奉

巡撫陳 批各衙門食米獨取盈於嵩明一郡誠
屬偏累據議於各州縣秋糧內量行抽收旣官省

加賦而催科無復擾又民免賠輸而撫字得其方
里甲舖行咸更蘇息矣如擬通行遵照永爲畫一
之規此繳

雲南等處提刑按察司爲急救三村人畜倒懸生
命事據普坪村鄉約會李仲春等呈稱照得普坪
石鼻高橋三村軍民原有牧放湖海草場被總府
家人蘇忠王美等強占爲蓮花池告蒙

巡撫陳 批行本司行委董王二知府踏勘明白
呈蒙本司將前湖海草場照舊斷歸三村轉呈詳
乞賜委官督責各村自出工食勒石垂碑以圖
久安等因具呈到司據此卷查先據李仲春等呈

同前事已經行委知府董原道王道廣會同將前
湖海草場勘明如遇水泛斷令普坪等三村照舊
牧放水消露出洲墩之日卽報官起科納糧隨將
百戶趙尚仁叅問家人王美等擬罪詳乞發落今
據李仲春等所呈懇要勒碑一節無非爲垂永久以
防積猾刁徒投藉總府家人名色復肆侵占之情
相應准從通行呈請合候詳乞備行雲南府動支
庫貯官銀伍兩行委通判趙溥督同千戶張良材
親詣普坪村喚集石匠採石豎立碑座將前議乞
緣由如遇水泛聽普坪等三村軍民照舊牧放若
水消露出洲墩之日卽報官起科納糧開立四至

刊附于上以垂永久不許刁猾棍徒似前投藉總
府家人名色侵占如有違犯許各村軍民人等指
名呈告以憑拏問照例究違如此庶刁猾棍徒無
復投充侵擾而地方軍民胥得安業生理矣奉
巡撫陳 批如擬動支官銀委官勒石紀界以杜
刁徒投獻侵占此繳又蒙

巡按劉 批如擬勒碑垂石繳

雲南等處提刑按察司爲重刻大學衍義補纂要
以嘉惠多士以章崇文教事議詳重刻大學衍義
緣由竊惟大學一書昔儒謂全體大用之學也其
本在乎身心其則在乎家其功用極乎天下之大

誠六經之總要萬世之規程聖賢以來傳心經世
遺法莫越乎此書而真西山先生從而衍義之工
文莊公從而補之又所以鏡古準今而推廣之者
也本職自幼嗜誦認爲纂要邇叨視學三楚曾經
刊布楚中徧誨諸士少爲教學相長之助適今滇
雲文教日興人才日盛衰然圩稱中土雖諸書略
備而大學衍義補全書獨未刊布又以全書浩博
恐諸生未能強力記問者或未得沉潛玩覆不免
有汗繁難竟之嘆近蒙

本院主張道模振作士類遴取合省府州縣學有
學行優長生員俱赴五華書院肄習樂育於其中

仰荷作人盛典所有大學衍義補纂要一書似應刊布徧惠諸生俾人人誦而心維之其爲有志修己用世之助諒非淺也隨該本司將書行令照磨龔濟世查算通計六本共五百二十八篇計字一十九萬八百七十五字查照布政司近議事規每版七百八十字給刊字工食銀五分該銀一十一兩六錢一分五釐每二篇用棠梨木板一塊該板二百六十四塊外加備用三十六塊共三百塊每塊價銀一分五釐該銀四兩伍錢抹板用清油一十斤價銀二錢三項通共銀一十七兩三錢一分五釐呈報前來又經本司覆查相同似應呈請

合候允示俱照數移行布政司於收貯課程銀內動支給委雲南府通判趙溥喚督匠役立期刊刻印刷以爲廣傳刊刻完日本部書板查發該府儒學掌印官收候取交代印信領式附卷備查其印刷書部在省府縣二學與各州縣習生員每名給發一部在外各學生員聽各府州縣掌印官備紙赴省印給其本司用過紙張給發過數目候完日另行呈報呈奉

巡撫陳 批大學衍義補誠修身經世之書也而今加纂要尤便覽觀滇邊宜廣此開示選方具見該司章崇文教嘉惠士林至意如擬移行布政司

動給委官督匠梓此繳

巡按劉 批吾儒修齊治平之謨莫要於大學而
衍義補者又真西山丘文莊之心奧也因其博而
纂其要反約之功尤切焉正宜廣示遐方覃揚文
教該司作人之意良可崇尚即移文布政司動給
委官刻日刊行繳

雲南等處提刑按察司為申嚴

明禁以禪鄉約以敦風教事議呈欽正風教緣由訪得
按屬地方士夫軍民人等多踵故習挨厥所由蓋
緣覺察有容隱之奸官府廢連坐之法以致愚民
玩愒舊習未除風教所關相應通行申明以振頹

風仍將

本院明禁開款條分庶使間闈易於通曉靡俗漸
以改觀合候詳允本司通行按屬有司軍衛大小
衙門一體遵照仍移行布政司動支無碍官銀刊
刻告示并書冊遍發合省地方城市鄉村張掛曉
諭士夫軍民人等務要悉照先今禁約各循十家
保甲定規互相勸戒覺察并行鄉約遇期宣講庶得
耳提面命之方如十家中間有一家違犯九家齊
赴舉究明正其罪若九家為其容隱許人告舉將
九家一體連坐其連坐者合依不應律究罪追贖
但連坐多係違禁之人代贖以致覺察不嚴仍於

罪贖外各加責十五板庶人心知警言其發落紙贖收貯該府州縣卽於數內量支貳兩給告發之人充賞如諸人舉首到官該衙門拘審是實而不究連坐之罪者官以怠政註考如此庶禁約嚴而人心警畏教化行而風俗淳美矣呈乞 照詳施行

一婚嫁不許爭尚奢侈

前件會議得婚禮人倫之始所以承宗祧垂嗣續雖有奠鴈結纜諸儀禮成而止今滇省婚禮不講民俗漸靡男家迎娶則擅用軍器鼓吹盈街女家送嫁則粧奩太侈誇耀市井甚者女家索聘索謝男家復索嫁奩徒費貲財反乖古道相應申

明以後嫁娶士民有物力者聘儀用釵環嫁奩用綾段衣服隨時首飾亦所不禁但要恪遵本院禁約不許過於奢侈其貧家檳榔酒果可作聘儀荆釵布裙亦是嫁奩不許論財其酒席儀文俱照定議裁省足以成禮而已敢有似前奢侈者重究連坐十甲媒妁決不輕貸有能首發者照例給賞

一喪事不許酒肉待客

前件會議得古稱喪致乎哀而止父母云亡及發柩將窆人子五內俱裂哭踊不暇而毀歎賓客乎子食於有喪之側未嘗飽弔客又奚忍飲酒

食肉於喪家也。今滇南風俗遇親喪及塋棺擲衣衾漫不加意。惟理宰牲設宴以供吊客。擇日開喪而供具未備。則日停柩不發。破產傾家以免俗人非笑。又有親朋送葬携酒殽以觴孝子者。有設奠倍索謝儀者。爰倫傷化古禮蕩然。所宜申明痛革。以後俱要恪遵禁約。不許仍蹈前弊。喪家三日既成服。卽聽親朋來吊。二十里以內唯清茶一盃。二十里以外方用蔬菜素飯一盞。送塋亦然。設奠止將奠牲分胙而已。其發引之具止許用棺罩銘旌亭座。以成喪禮。不許雇賃紅綵及紙造霜花雪柳等項。以滋浪費。及禮違者其罪連坐十甲及親朋之携酒殽以觴孝子并設奠倍索謝儀者。有能舉首照例給賞一。女喪不許爭孝。搬奩

前件會議得婚娶本期偕老喪妻特不幸耳。然二家親義未絕也。今滇南風俗或父母因女病亡或弟兄因姊妹亡。不論夫婦乖和家道貧富。輒引親舊上門爭索孝帛。少有不遂便主凌辱女。婿毀罵翁姑。將原陪送粧奩盡行搬取。甚非厚道。相應申明以後。俱要恪遵禁約。女亡不論有嗣無嗣。不許爭孝。搬奩以絕大義。違者重究。并連坐十甲及同事之人。有能首發者照例給賞。如

有女果被夫凌虐致死許赴官告理自以法論
有喪不許停柩日久

前件會議得滇省有喪之家或以宴賓之具未周
或以山家方向未利遂忍停柩累年中間逆子
頑孫復至藉口二事世代相沿數柩停積上干
天和下逆人道誠非細故及有等狡潑之徒不
畏法度每將各處墳塋樹木肆行偷砍不但風
水被其傷殘抑且小惡漸成大患如近日掘墓
之賊皆由此出是亦薄俗之一端也通應申明
嚴禁以後俱要恪遵禁約不許復蹈前非仍仰
十甲將有喪之家申諭嚴督使刻期舉殯安葬

間有貧不能舉者許親戚隣里以義周恤悉令
歸瘞其墳塋樹木仍行緝緝戒諭不許鄉人盜伐有
不遵者俱許十甲告官重究十甲容隱一體連
坐有能首告者照例給賞其初喪而未有葬地
或有地而山向不利者聽從擇便安葬

一親亡不許輕用火化

前件會議得火化始于夷狄逆理之至大者夫古
者敝蓋敝帷以埋狗馬况於骨肉而忍投之烈
焰乎滇雲風俗凡有喪者藉稱火葬多為焚屍
檢骨之舉習染夷風深為可痛相應申明今後
鄉約凡遇有親喪者俱要以理勸諭遵禮安葬

敢有不遵禁約者其罪連坐十甲及件作扛擡
之人有能首告者照例給賞如外處人亡以路
途險遠子孫不能扶襯歸葬許告燒化聽後其
便若外處未經告明給照或本地故捏外途而
擅行燒化者一體重究

一寺觀不許婦女遊覽

前件會議得闕觀女子之貞遊覽已失婦道况寺
觀乎滇省民間婦女多以鄉會誦經為名成群
結伴遍遊寺觀至遇三時五臘或迎神賽會男
女溷雜為姦為盜多由此生善男信女決不為
此相應申明禁革今後士庶良家俱要禮束婦

女不出閨門敢有不遵禁約仍前故犯者本夫
并住持僧道一體坐罪有能首舉者照例給賞
一光棍不許哄誘子弟

前件會議得本省有等光棍不務生理巧計詭謀
誘哄良家子弟騙財度日彼愚頑子弟輕信易
惑如酒食費用則不惜資財淫賭放肆則甘心
破產深為可恨相應申明今後鄉約遇期宣示
痛行禁革以挽頽風違者重究及連坐父兄十
甲不貸

一隣佑不許縱容賭博

前件會議得滇省遊徒欲誑騙富家子弟之財多

以賭博爲名而開張賭場之家又多方誘引招集壞人心術傾人家產深爲可恨相應申明禁約嚴行各該巡捕官訪拏如有犯者照依律例從重究治仍於門首書賭博之家四字示警隣佑十甲知而不舉者一體治罪有能首告照例給賞

一雙言際不許匿文投帖

前件會議得匿文投帖律法甚嚴而滇民澆頑獨多故犯凡有小隙輒爲匿名帖故捏浮言希圖誣玷或見官故擲於庭階或乘夜暗帖於街市此等暗地害人自謂心生巧計不知神目如靈

畢竟難逃天刑相應申明使各變惡從善即可轉禍爲福今後各該地方凡有匿名文帖見者卽便剝去燒燬不許聞知於官若能連人捉獲方許送官依律給賞犯人從重擬罪如不遵禁諭知情容隱者連坐不恕

一兄弟不許誣爭家財

前件會議得子孫長大分財異居明立分單親族盡押所以息爭端也中間有不才子弟蕩廢家私聽信奸徒生情告訐又有親族尊屬受財偏護主斷不公以致骨肉相殘身家不保相應申明今後嚴行鄉約遇有此等之人從公詢訪如

果用強多占卽與處分倘係打網行私卽便呈官究治若有縱容不實者十甲與親識連坐以罪務俾同氣不致相戕庶友愛篤而倫理正矣呈奉

巡撫陳 批據議申嚴禁革婚喪奢侈宴飲賭博倡淫諸件咸與

本院先行條約及節發出告示之事理相同具見該司道協力共濟永期挽回頽風之意悉如擬查照一一申飭施行務臻實效繳

巡按劉 批此中軍夷雜處習尚乖方又美據議十條誠足以敦禮教而正人心有關於風化甚切

非嚴禁連坐無以挽此狂瀾也卽如擬刊示廣諭嚴約遵行此繳

雲南等處提刑按察司爲矜恤獄囚以慎重民命事呈詳動支官銀買米濟給無食人犯并改設監舖及分禁人犯以除疫氣緣由爲照雲南府司獄設附省城各衙門有情罪未協詳解司道多駁行該府再問以致囚犯日衆多被淹禁自今年正月起至六月止本司查得發監人犯身故者一十九名

以此較之則各衙門發監病故者又不知其幾詢其根由有因監無獄食而忍餓死者有在羈候舖內供送獄食不便而澆禁死者有監犯聚多穢氣染疫病而死者有因各鎮撫監房

漸圯不便關禁者有司獄官典提牢該吏牢頭禁
子強索非刑拷死者凡此五者皆係宿弊殊非慎
重民命意也本司已行該府查報除有囚糧并家
屬供送者外其一爲無人供送獄食犯人阿白等
四十一名在監乞西度日今議行每月動支本司
并分巡安普道紙贖銀共三兩糴米造飯濟給囚
饑以日計之每人止費銀二釐一毫量充二食之
用若人犯發六衛鎮撫分禁內有無家屬供送獄
食者亦量將前米分給後來犯人減少當酌量裒
益通融扣筭作正接放登報循環以祛冒濫之弊
斯囚犯乏食瘦死之患可免也其二爲該府原設

羈候舖於監外專爲拘繫輕犯以便供送今本舖
之門開於府大門之內且無井水人犯遇渴用巴
一手止得半確專被候缺獄典禁受需索燈油監
錢家屬送飯出入大門皂隸措勒多致恐饑淹禁
則輕犯其何堪命乎今議將羈候舖門改於旌善
亭內左壁開設一門由本亭正門出入直通大街
便於家屬供送庶免措勒需索之端斯輕犯供送
獄食不便之害可免也其三爲該府在監人犯甚
多鬱蒸氣染疫疾屢作今議於六衛鎮撫監內分
投監禁若在府監百人以上者分禁各鎮撫每處
止一二十人庶各監數少不致鬱蒸斯類聚染疫

之病可免也其四爲各鎮撫監向係鎮撫官專管以致開閉無禁恐有疎虞今議將各鎮撫監鑰付鎮撫官管收以便啓閉俱令本衛掌印指揮督管庶事有責成不敢私下擅開以免疎虞如違一體究治各鎮撫監房雖稱已經修完止委百戶等官管修終非堅固仍應行委經歷陳鳳舜再行估計合用銀數聽都司徑自呈請動支卽令本官督修完固用便關防各府州縣衛禦所鎮撫并斷事司各監房俱要鋪置地板離地尺許以遠濕氣不致成疾斯關禁疎虞之累可免也其五爲各有司軍衛衙門監內俱是霸惡牢頭積年禁子每遇發下

人犯到監如虎視羊輒便通同司獄官典提牢該吏索要監錢稍有未遂不論情犯輕重則白晝而扛上櫃床用棍敲其足底欄門邀絕獄食致使人犯忍饑受刑真可奈何只得傳信家屬稍送銀肥到監通索入手方纔寬放內有無家屬各犯偶遇取出輒就強剥衣物爲當怨恨積深惟圖利已專用非法凌害其情尤爲可惡皆因各掌印官不加振刷故生蠹端今議嚴加禁革通行掌印官將獄內霸積牢禁一一革退時常戒諭司獄官典提牢該吏不許仍前將發監人犯剥當衣物用強需索非法凌害如違聽掌印官從重叅呈究治斯官吏牢

禁強索非刑拷死之寃可免也凡此五事關係民命相應酌議呈請合候詳允備行雲南府遵照今議將內無人供送獄食犯人阿白等四十一名自本年七月十六日爲始每月動支本司并分巡安普道經理紙贖銀共叁兩糴米發司獄官典查照人犯多寡支發禁役造飯分給若犯人分發各衛鎮撫將前米量行給發如人犯減少通融扣算作正填報循環又將羈候舖門改於旌善亭內開設以便舖犯供送獄食在府監人犯仍量分發六衛鎮撫每處一二十人收禁各鎮撫監俱令掌印指揮督管不許鎮撫官私開賣放取究其各鎮撫監房行委經歷陳鳳舜逐一估計合用銀兩聽都司徑自查照舊規於原議椿木內動給本官督修完固各該掌印官將獄內羈積牢禁革退時加戒諭司獄官典提牢該吏不許仍前非法凌害發監人犯剝當衣物索騙監錢如違聽掌印官從重參呈究治仍移關兵備分巡道通行各府州縣衛所鎮撫一體遵照施行庶饑囚可保聊生囹圄不致酷害所以仰體

欽恤之仁以慎重民命者在是矣呈乞

照詳施行奉

巡撫陳

批據議給獄食以活人改舖門以便衆

發衛監以分禁與夫官典該吏牢霸凌索諸弊具見該司道清狴犴慎重民命之美意也悉如擬併行各道一一查照施行此繳

雲南按察司爲議革松南二壩委官抽稅以肅政體以蘇小民積困事照得省城東門外有盤龍江一道其江上下立有松花壩南壩二座成化年間止撥老人看守二壩水閘後有軍民槳船裝載柴木松毛煤炭等項經過老人向與取計些項柴炭私用其初甚微其後漸廣地方人見伊獲利呈報鎮守內臣遂行都司議呈委官抽分柴炭松明按月解送本監收用嘉靖元年遵奉

欽依革回本監前所抽取議徵空月銀二十四兩年終解發昆明縣庫收貯此外按月仍送

都察院并書房門皂柴共八千七百五十斤炭共一千三百斤相沿到今會議得關市譏而不征乃王者仁政之一端故周官委人之設允掌斂蔬材木材蓄聚之物惟斂之於野而不取之於民蓋不盡利以遺民也自唐趙替始稅天下竹木十取其一一以爲常平本識者病之以爲言利太悉非古之我

朝於凡天下關津去處設官抽分竹木柴炭等物取價值銀兩支解係通衢大江富商大賈別處興販

獲利最厚者故量徵之以佐經費耳其自本地出
辦爲民間經營日用之需者聽其自便例不起稅
殆不以征商者而厲民也至於滇省僻處遐荒不
通舟楫二壩皆山河細流止堪小槳往來非中州
通衢大江比原無商賈販買其樵採裝載皆鄉民
肩担首戴而來者耳目睹記來路極苦於此加稅
是罔利病民之媒豈

國家征商抑末之法意也哉誠屬未便近嘗咨詢民
瘼其可革者有五夫二壩抽分作俑于老人釀成
于太監今太監旣革而苛政猶存此可革者一也
總計年額抽收之數每壩三十餘兩委官索取所

入豈止幾百兩科害細及於瓶罍攘取下察於雞
鳧指稱刷壩之名箕及刀錐之利此可革者二也
應稅貨物已報稅課司矣二壩乃復抽刷是一路
而三項抽稅細民何堪此可革者三也邇考二壩
之設本爲水利此水發源自北邵甸山麓中各泉
與諸澗合而爲一蜿蜒會於盤龍江至松花壩乃
分而爲二其一由金馬山之麓流過春登里其一
由南山之麓流過郡城入於滇池前代爲堰爲壩
興圯不時民常苦之景泰年間

巡撫都御史鄭 會議請

允甃石爲閘設守者以時其啓閉水涸則閘止以資灌

漑水滂則放閘以廣疏通卽金馬一帶非松花壩則水凹無以救荒南村一方非南壩則水壅無以救潦水利所關荒政攸寓也今藉農溝以行抽刷是稅利興而水利廢昔人設壩之良法美意虛矣此可革者四也貨船裝載必借水勢通行今定額抽分則水溢之年船多貨廣其入數倍水涸之歲船少貨稀未免賠償又聞奸猾之徒指稱總鎮裝載船隻俱得經過放免此不過銖求於懦弱而無以厭服乎人心此可革者五也凡此五弊似爲可革及照二壩抽收舊時宿弊今日爲民除害固當會議查革之矣訪得議革本監之時官雖革去而

利窳所在足以妨政擾民者尚多各該地方有司阿徇苟容迄今因循而莫之清刷者恐不止如貳壩抽刷之弊也金騰等處地方曾有太監坐鎮比時各該有司軍衛亦或議有前項抽收并別項蠹政病民俗弊或屬在官或屬在鎮亦或屬在該地方者相應通行查革以蘇地方積困合候詳允將省城松南貳壩一應抽稅并本監空月柴薪銀兩及委官盡行裁革聽從軍民往來裝載仍行屯田道自隆慶四年爲始每年選委原巡水百戶官貳員在前貳壩守閘以司啓閉仍聽雲南府佐貳官壹員督同管理在外地方關行兵備分巡各道通

行各該所屬府州縣衛所一體清查如各該地方
原議有前項抽稅并別項蠹政病民俗弊俱盡行
查出徑自通詳裁革其供送 本院書本房及門
皂松明柴炭等項除松明近已議入昆明縣節省
里甲書冊內供送外其柴炭查照原議每月共送
柴捌千柒百伍拾斤每千斤價銀伍錢該銀肆兩
叁錢柒分伍釐炭壹千叁百斤每百斤價銀壹錢
貳分該銀壹兩伍錢貳分貳項通共銀伍兩玖錢
叁分伍釐俱于稅課司赴解稅程銀內移行布政
使司動發昆明縣查照按月照數買辦呈送本司
仍摘出簡明告示遍發松南貳壩附近州縣沿岸

高曉安江大魚獨樹海口茶卜墩等鄉村一體常
川張掛曉諭俾人人通知處處遵守以後各地方
官再有私擅抽取壹柴壹草者聽本各司道叅究
重治如此庶抽稅之宿弊悉除衙門之政體自肅
不惟水利疏通而數十年小民繁擾積困可息肩
矣合就通詳為此呈乞
照詳施行奉

欽差巡撫雲南兼建昌畢節等處地方贊理軍務都察
院右副都御史陳 批刷壩抽收柴炭其來遠矣
設攤之初意蓋欲節省里甲之供需而裁抑商賈
之逐末耳詎期流弊反滋委官假此越抽他貨致

困小民且妨水利本院訪知此弊方行昆明縣查處未報而該司亦有此會呈誠得此心之同而足祛宿蠹之舊也如擬行各遵照出示永革不許抽收若巡水看閘員役敢有故違私收壹草壹木坐贓究治此繳蒙

巡按雲南監察御史劉 批稔聞劓爛之設雖係內臣舊例中間亦有抑末奉公節省里甲之意故又因而未革有由然矣今承委員役指倚病民其撫院吏書供應柴炭新經議入丁糧則哀彼省此理宜禁革既經該司會議前來即當聽從民便仍候

撫院詳示行繳

雲南等處提刑按察司爲掩骼埋胔以恤孤魂以召和氣事議呈掩埋暴露屍棺骸骨緣由本司看得省城各門郊外暴露屍棺丟棄骸骨甚多致積幽冤有傷和氣近奉

本院示諭掩埋誠澤及枯骨之德意也但各民有係夷羅不知歸葬之禮將屍棺暴露內多無主間或一二有主者又因貧苦之甚如雇倩土工扛擡止用四人所費不下一二錢亦不能奏辦或異鄉流寓人民流落不能殯葬故忍暴露丟棄非得已也但各地方巡視衛官正可查理欲委之督催掩

埋多不能仰體

上德宣達下情若在官不為措處而欲責成各地
方掩埋尤恐休戚無關緩急難濟或止淺土潦草
塞責一遇陰雨衝發仍前暴露徒滋虛文無裨實
意其在外各府州縣禦所驛堡村屯鎮店各處所
拋棄屍棺骸骨亦或有類省城今當年殘歲臘之
時相應通行酌處量助乘時掩埋合候詳允將在
省行雲南府備行六衛巡視官查理仍委昆明縣
縣丞李裁會同斷事司司獄黃守信其迤東迤西
地方移行各兵備分巡道通行各府州縣禦所即
趨及殘天寒之候將郊外一應浮坵暴露屍棺骸

骨逐一查理除有主而力能葬埋或鄉約自願義
助者外其有主而無力無主而暴露者動支無碍
官銀量助給一二錢雇倩土工或歸葬義塚或選
相應官地盡行掩埋其在外驛堡巡司并各鄉村
鎮店亦或有暴露丟棄屍棺骸骨者仍行各該掌
印官行令該管村屯鄉長盡數開報一體照前擇
地資給掩埋以後每年初冬各司道通行所屬遵
照前議動支官銀助給掩埋各將動過官銀掩埋
屍棺骸骨數目造冊通行繳報庶骸骨不致暴露
幽魂得安泉壤固古月令掩骼埋胔之舉而王政
使民養生送死無憾之遺意也呈乞

照詳施行奉

巡撫陳 批據議通行遠邇衙門查理掩埋骼骨誠得博愛同仁之意如擬速行各道行屬遵照舉行毋緩其間無主無力者量動官銀助給通完冊報以後每歲初舉查一次著為定規此繳奉此又蒙

巡按劉 批掩骼埋骨乃王政之所當先况冬至以來正其時矣或民惑于習俗限於無財以致暴露親骸有傷和氣該司即便嚴行合屬一體奉行以後永為定規年終一報動過官銀造冊稽查務使幽明均霑利澤毋徒及于城市也此繳

雲南等處提刑按察司為代弊除患以靖地方以甦民害事議呈六衛巡視官卑生事害人保障縱賊緣由該本司掌印按察使徐 會同布都二司并守巡各道議照滇省城池設自洪武年間因僻在遐荒原奉

欽降巡城夜巡銅牌收貯都司責任頗重與發收鈐官員無容別議其各地方巡視伏路巡捕千百戶共貳拾捌員巡軍壹百玖拾伍名分布關廂內外專為緝捕盜賊邇來各該員役不知巡緝多事貪求地方每有窩盜姦宄事情受財隱蔽拏放自由嚇騙軍民貽害已極六衛操捕鎮撫恒用積年軍伴

滇臺行稿 卷四
搜尋事故科罰貪索近已土允崇革民患稍除今約正陸銘等復有此呈蓋六衛根尤未絕耳省會重地有府縣六衛督捕撫禦多官管束又有鄉約保甲聯絡平時隄備謹嚴則盜賊自息居民獲安前項巡視伏路巡捕官軍誤爲濫設地方失事每因官多互相推調無益有害似應量革及照六衛保障之輩原係屢犯賊首因其慣於詖探賊踪設爲守護地方近來各徒每與賊夥交通窩藏指引坐地分贓泄漏事情送令逃避甚至姦占娼婦爲妻唆賊供攀良善乘機詐騙靡所不爲及至督併拏賊妄將無辜塘塞玩寇妖民積弊已久欲將各

徒查發本管官司鈴束未免潛避鄉村糾引爲盜益滋害人亦應酌處合候詳乞備行雲南都司并雲南府遵照將各地方伏路巡捕等項名色官軍盡行革去六衛原有操捕指揮六員就令城內督軍巡緝城外再設巡視官六員每衛各撥壹員都司仍會守巡道揀選謹飭老成千戶委用將原置巡視紅牌查給各官率領精壯巡軍捌名分界晝夜巡邏地方年終更換以均勞逸事完將選用過職名軍數呈報

兩院查考遇有管轄所犯窩盜姦宄人命等項事情各總小甲鄉約開報操捕巡視官就便拏送府

江寧縣志卷四
縣問理招詳司道轉呈 兩院詳奪不許仍前需財隱蔽生事害人鎮撫官止許看守獄囚不得干預地方訟事如有違犯查訪得出或被告發定照律例從重叅問其各地方保障盡行查出總附雲南府衛督捕官管束如係外境者遞回原籍當差係省城者責付本管官旗里老隣佑人等收管取具不致縱容通賊害人其結在官省令聽用別營生理仍置印信文簿壹扇將各姓名年貌貫址登記不特稽查如遇地方盜賊竊發保結差令各役查訪踪跡務將真正賊賊解官從重犒賞敢有交通外賊窩藏指引坐地分贖泄漏事情送令逃避

玩寇殃民者定以強竊盜窩主罪之官旗里老隣佑知而不舉一體連坐庶奸頑知警而群盜自遁冗員革而地方獲安矣呈奉

巡撫陳 批各該巡視官軍縱惡殃善其流之弊為日已久如議裁革悉聽巡捕指揮督察除專務緝盤奸宄及查詰無主人命巡警等事外別項俱不得干預挾害違者叅治枷號不恕保障去留管束各項如議查照行繳又蒙

巡按劉 批前項員役之設本為巡邏盜賊安輯地方近以委用雜還查聞踈縱以致奸宄肆志玩寇殃民甚矣今該司裁其冗員覈其障役使之官

有專責而軍有番休生民不苦于騷繹之多端矣
即如議行繳

雲南等處提刑按察司爲極苦民情事隆慶三年
八月十五日奉

撫院陳 批據本司呈奉

本院批據段絹三梭舖戶許鯉聶良桂許策徐茗
等連名告稱鯉等先年十家明辦尚累傾家近年
止有四人答應各衙門段絹梭布梅紅紙等項俱
產南京蘇杭來真萬里舟楫不通肩挑馬駝動經
年餘脚價關稅甚多貨價倍增且官買只議彼中
價值近日各衙門取用如仁心者照依定規給價

間有不垂恤者十中一與四五不惟虧少抑更遲
延稍若項遲便加刑責只得畏法揭債買辦虧折
太多號訴無門切思昆明縣貳拾陸里十年一當
尚得九閑近蒙憐恤無不稱便况舖戶四人逐月
輪辦無日空閑情苦不堪懇乞吊查先年憲案價
值文冊俯賜議處庶情苦少甦免細民受虐等情
奉批仰按察司查議報奪奉此卷查嘉靖叁拾伍
年伍月內蒙

按院陳 批據雲南府推官黃喬呈爲議革強買
貨物事議詳估定各行貨物價值數目并條議應
革宿弊緣由蒙批據議似已明悉按察司覆覈無

異俱查照施行蒙此本司行據該府拘喚舖戶開
造物價連人解司會同查審覆議明白呈蒙

本院批據議尤爲詳盡官民兩便矣俱依擬施行
繳蒙此已經備行該府及判板榜懸示逮刻書冊
遍發在省衙門并各行舖戶遵照去後今奉前因
依奉案仰雲南府推官陳昌言估勘段絹梭布梅
紅紙等項官價市價有無相同逐一查議停當務
使官民兩便經久可行開款詳報以憑酌處轉呈
用垂永久今據該府呈准本官牒稱遵將各行舖
戶許鯉甘節徐茗秦儒馬紹陽彭夔等喚集到官
查審得冠帽金寶象牙布帛毛褐扇帕紅花氈蓆

靴襪絨線顏料銅錫銅器鐵器木器竹器磁器瓦
器鞍轡轎傘執事磚灰藥餌香料皮底雜物魚肉
鹽料細果茶食蜜煎蔬菜枳榔油糖等項舖行原
估價值至今無虧其段絹京帕梅紅栢綠奏本紙
劄白蠟檀香等項屢詢原議價值止與產地相同
委有虧損臘酒壹項原價似多卑職原情酌議少
加損益俱稱公平衆心允服取具各行舖戶甘結
在官但在位者肯自愛下如議遵行則舖戶免虧
折之累商民無嗟怨之心間有不自顧惜濫取舖
戶貨物虧損價銀及縱催取舍丁人役生事需索
至交納之時又故意精粗其物輕重其價畱難其

人屢次換易甚至吏書人等乘便附銀混買希圖
便饒有官取壹貳件而私取叁伍件者及領價之
日上下使用不勝其繁庫吏索錢將半其價縱使
速領猶且不能如數况數日數月而又甚至有經
年者乎宜乎舍而不領如投諸水火也小民將何
以養生耶各該舖戶雖蒙印給文簿每遇各衙門
票取諸物俱令填候吊取不過因循虛應請乞出
示申明曉諭各舖戶行頭人役另置空白文簿壹
扇送 本院印給將議定本行價值附寫於前就
令當月行頭收執如某日某衙門票差某人取某
物若干係某處用某日給價若干差人有無尅勒

價銀有無減少逐一備寫明白中間雖無減少需
索之弊亦要挨次填寫每月朔日赴 本院查發
仍將議允書冊刊令各行頭俱領壹冊如遇各衙
門取貨卽如數連書冊貨物同送到官請照書冊
給價若查有非因公務濫取減價并給價遲延差
人索害情弊卽行拏究等因牒府造冊呈詳到司
據此該本司掌印按察使徐 會同布政司掌印
左布政使鄒 左布政使陳 守巡安普道左叅
政朱 副使張 為照居官之體本以節用愛人
為主商賈之計難以資本營利為生凡各衙門公
用禮儀等項在所未可已者不免取諸舖戶若能

償之以公平之價而又給發以時則亦何病於舖
行哉矧茲省會之地諸司並建公用尤繁故先年
節有價值成議夫何奉行既久漸致寢弛中間能
依原議卽時給價者固有而率意減價或延久後
時或支吾不給者不無在下者苦於傷本在上者
流於厲民無惑乎各舖戶許鯉等鳴苦至此也今
蒙 本院軫念民艱通達下情批行查議誠商旅
息肩更生之會也據推官陳昌言查照舊議書冊
逐行逐件審估議報前來各司道覆加會議除查
與舊議相同者如冠帽金寶布帛毛褐扇帕紅花
氈蓆靴襪絨線煩料銅錫銅器鐵器木料木器竹

器磁器瓦器鞍轡轎傘執事磚灰藥餌皮底雜物
魚肉鹽料細果茶食蜜煎菜蔬檳榔油糖計叁拾
貳行價值并議收稅額俱照舊冊外其間有原議
未及者有昔議雖良而年久事移所當變通宜民
者如有司給價遲延差人索騙舖戶閱操免用綾
段衙門指稱生事稅課隱瞞勒索五者是也又如
節省造傘之絹更易卓圍之綾糊窓之紅紗箱簾
之青段及夫米價之消長五者又所當隨事斟酌
其宜者也又有各行貨內價值比原議互有增減
所當裁定者如紗段行內南京長短三匡段福州
絹京帕紙劄行內大小梅紅栢綠奏本紙蠟燭行

內白蠟香料行內檀香酒醋行內臘酒共壹拾貳
項是也俱應逐一會議呈請合候詳允本司備行
雲南府遵照及將今議前項事宜俱於舊書冊板
內各行項下增刻改正移行布政司動支官銀買
辦板料紙劄并匠役工食從新刊刷將動過銀數
徑自呈報其刷完書冊通發在省大小衙門并各
行舖戶遵守仍出簡明告示曉諭各行舖戶知悉
令各置空白文簿壹扇送 本院印給凡遇各衙
門取物給價俱照今所會議從實登記每月於朔
日各行舖戶俱執簿齊赴 本院聽查如有官府
虧損價值或遲延不給及差人吏庫剋減勒索等

弊許即赴 本院陳告拏問叅究如此庶物價公
平舖戶無虧損之累立法嚴密貪猾免索騙之奸
在官知搏節愛養之宜在下有遵守畫一之法不
惟民瘼可瘳而官常亦肅矣惟復別賜定奪呈乞
照議施行奉

撫院陳 批滇省原隰險遠舟車不通商旅興販
貨物舉皆肩擔背任跋涉艱辛而各衙門公用禮
儀取諸舖行亦多減其價值或給發後時甚至差
人需索指一科十往往往虧累所以本院先行禁約
矣夫何法久弊生而諸物之估原有成議顧乃弛
紊加之貪縱人員罔卹民瘼不速如數給價誠爲

衣冠之盜與小民爭刀錐之利者據議悉得公平之體增課釐弊之方蘇商賈惠軍民之意如擬移行司府一一查照施行仍出示曉諭及於舊書冊內增刻改正遍發在省大小衙門永爲遵守此繳奉此本年十月二十四日又蒙

按院劉 批據本司經歷司呈同前事蒙批據議殊爲明悉不惟甦商困而礪官箴又足以革浮華而省實費至於約傘絹易窻紗尤得節上風下之義卽如議刊行永爲遵守此繳蒙此案經通詳去後今奉前因合行刊布爲此合給書冊通行各該衙門官吏并各行舖戶人等永爲遵守以甦商困

施行須至冊者

計開

一禁有司給價遲延之弊

前件會議得昆明縣設附會省答應浩繁上年遇給物價間有應動官銀必待申覈而後給者有應動該縣支銷銀將領狀批令老人徑給者每致吏庫老人刁蹬舖戶守候甚難先年立法禁革迄今事久玩愒今照該縣取辦上司公用貨物雖時有緩急不同但給價遲延之弊皆由吏書老人鼓弄所致也若該縣能留心處給則吏書等役自不得緣以爲奸矣今後該縣掌印官

凡公取舖戶貨物應給價銀如應徑給者即時
給領或應申請者作速申詳卽給要在本官留
心力行痛絕吏書之蠹敢有稽延刁蹬復滋宿
弊許舖戶指實陳告官吏叅究

一禁差人索騙舖戶之弊

前件會議得各衙門取物差人索騙舖戶奸弊多
端先年雖經議革至今法久蠹生相應申明嚴
禁合令各行舖戶每行置空白文簿壹扇約壹
百葉俱送 本院印給將議定本行貨物價值
附寫於前輪令當月舖戶收執如遇各衙門取
物差人將票送交當月舖戶卽回舖戶照票於

簿內登記某日奉某衙門票爲某事差某人取
某物若干隨將所取物件同原票送官查照原
議價值數目卽時給領或待轉申亦速申允卽
給舖戶仍登簿內某日領價若干訖如有虧減
價值及差人指稱嚇索財物等弊亦明白登簿
俱候弔查追究其有領票差人不付當月舖戶
散投衆舖戶漫行索騙者許被害之人赴告從
重究問庶禁制嚴而索騙之弊可革矣

一除閱操取用綾段之弊

前件會議得每歲都司操練聽候 三堂閱視凡
應賞官軍舍餘先年旣賞絨花紅絹銀牌後又

過賞綾段布疋所給價值不敷且綾段布疋有精粗美惡不一故官軍冒虛賞之名舖戶受虧損之害因稱不便議將綾段裁革量添銀牌代綾段充賞此議甚便第該吏惡其妨已久不遵行每遇閱操仍票取綾段紗絹充賞動至百疋之外費價至百拾餘兩以致舖戶虧損紛紛告累殊為未便相應申明嚴禁今後閱操都司須遵前案止許量備銀花絨花應賞外其設綾紗絹布疋盡行裁革量造輕重銀牌准代綾段紗絹布疋充賞餘剩貯庫作正敢再仍前故違許舖戶指實陳告等吏坐贓問革庶官軍既蒙實惠而舖戶亦免虧擾矣

一革衙門指稱生事之弊

前件會議得在省舖戶專備答應上司公禮并衙門公用什物及日用有不可已者皆照依議定價值兩平買辦近來有司軍衛官員中間固多守法自愛者但有指稱公用私買匿已者本買壹件取至叁肆伍件乘機虧損甚至將不係緊要之物圖利濫取者尤多及有首領并巡捕鎮撫倉驛等官凡私已所用或假藉聲勢出票令舖戶辦交或指稱上司給取而曖昧騙價坐使舖戶敢怒而不敢言非惟有厲於舖行抑且大乖

漢臺行稿 卷四
乎政體相應嚴禁今後府縣衛所各官務要恪
守官箴潔已自愛凡有公用貨物於禮不得已
者取買即時照議給價不得遲延尅減及不得
於實用之外冒濫多取虧累舖戶其首領捕撫
倉驛等官亦不得濫出票帖擅取貨物及指稱
上司衙門給取物貨匿已自干法紀如有違犯
從重參究

一禁稅課隱瞞勒索之弊

前件會議得本省稅課司先年抽收稅課多被官
吏巡攔隱匿侵尅後議將一應貨物分別定稅
刊懸板榜每季委官壹員督同該司官吏監收

季終類解其法已善夫何法久人玩而承委官
員廉慎自愛者固多貪汚不檢者亦有或額外
倍索而百計刁難或指稱夾帶而多方嚇蝕或
侵分正課而捏稱不敷或隱瞞餘羨而充實私
囊諸凡蠹弊沓出以致商販畏其稅重費多而
憚於往來因之市賣稀少則物價騰貴物價騰
貴則舖戶難於供辦又有貧苦小民販賣水東
瓜皮刷綠布皮并草紙脚布棕箬衣皮硝之類
俱係肩擔背負其生理至小勞力最大原情定
法所當免稅而勿徵之者也相應申明嚴禁今
後嚴諭監稅官務要廉勤以克

國課公恕以恤商旅其一應貨稅俱照原定榜示額數抽取不得額外多索絲毫如遇客商到司報稅即將馱載間抽一二查驗如無藏匿貨物方許報納本等稅課若果有夾帶私貨連人送司究罪不許將搜出段疋象牙等物乘機減價勒買其水東瓜皮刷綠布皮草紙脚布棕蓑衣皮確俱免納稅違者許商人陳告官吏坐贓問革庶

國課充裕商旅願出於塗而舖戶自蒙輕省之惠矣一節省造傘之絹

前件會議得各衙門大小涼傘舊規黃傘每副用四絲絹六丈壹尺給銀玖錢柒分伍釐青傘每副用福州絹陸丈捌尺給銀壹兩叁錢捌分傘裡并兩傘共用紅眉州絹玖丈捌尺每尺給銀壹分約其絹似為太費計其價又多虧減訪得各該吏書通同匠役每造傘四把卽剋落壹把絹料以為私賣肥已然則舖戶安得而不賠累哉本司隨案行該府併議回報前來覆經會議用裁縫官尺量得大小涼傘如用黃四絲絹止該用伍丈該價銀壹兩玖分叁釐柒毫伍絲比舊省絹壹丈壹尺增價銀壹錢壹分有零如用青福州絹止該用伍丈玖尺該價銀貳兩肆錢

朱分肆釐壹毫陸絲伍忽比舊省絹玖尺增價銀壹錢玖分有零傘裡紅眉州絹止該用伍丈叁尺該價銀柒錢陸釐陸毫叁絲玖忽大小兩傘共用眉州絹叁丈叁尺玖寸該價銀肆錢伍分貳釐傘裡兩傘貳項比舊共省絹壹丈壹尺壹寸增價銀壹錢柒分有零此議用絹既省增價尤平官民兩便今後凡造各衙門大小黃青涼傘兩傘俱照後開估定絹尺丈尺數目式樣製造著為定規永為遵守各吏書人等不得通同匠役妄自增減尅落如違重究

一更易卓圍之綾

前件會議得各衙門卓圍固禮所當用但可以備用卽已舊時凡造卓圍俱取用紅綠花綾近訪前綾出在南京蘇杭等處來路甚難販賣者少舖戶甚病之合以川中四絲絹代用為便不必用綾以累舖戶今後凡造各衙門卓圍俱用紅四絲絹為圍裙綠四絲絹為走水照依後開式樣裁剪緝製著為定規永為遵守

一更易糊窓之紅紗箱簾之青段

前件會議得近據舖戶許鯉等告稱先年凡修兩院并司道各衙門俱用紅紙糊窓青布箱簾已定規後因昆明縣張知縣到任本官非禮

趨奉觀美將 兩院內窓櫺俱取大紅花紗糊
表殊簾邊道走水俱用青段箱沿遂襲到今未
復舊規思得前項紗段俱產自南京蘇杭等處
來路甚艱乞將糊窓改用紅冬絹箱簾改用青
布公私俱便等情緣紗段價高而難辦絹布價
輕而易取亦節省之一端也合今後凡修理及
兩院內糊表窓櫺或照舊用紙殊簾沿邊走水
俱取廣青或本處白折布染青用之其紅紗青
段俱免濫用冗費庶在官之財用稍節舖戶之
虧損可免矣

一米麥行價值

前件會議得米價雖原議定值數但歲有豐歉不
同難拘一定今議令各舖戶置立大團牌壹面
送雲南府直寫米價并舖戶姓名每朔望日當
月舖戶執牌赴府稟報米價有無消長一次如
遇米少價騰及米多價減俱各批註於牌各依
時價平買給領若與原議之數無增無減亦照
原議查給庶不致虧損小民矣

一酌議物價

前件會議得已上段絹京帕紙劄白蠟檀香臘酒
共壹拾貳項價值俱經本司會同逐件量物增
減協諸時宜合照今議給價但數內段絹之類

非有公禮不得輕易取用其京帕雖議價值在
罔各衙門不得濫取止用滇帕為便大小梅紅
紙因近日各衙門費用太多委屬虧累今後遇
各官有新任陞任喜慶公賀者方量用申樣小
樣梅紅紙張以成禮其大樣十葉梅紅價重而
費多不得濫用其餘常會止用十葉奏本紙作
東往來不得仍前濫取梅紅以滋冗費病民也

各省行稿節要

附後

山東等處承宣布政使司為議定實徵歲額成規
以一政體以便民情以杜紛更弊源事准本司掌
印右布政使徐咨稱竊惟徵收賦稅乃

國家之常經清絕弊源實為政之要務蓋必總額有
一定之規斯徵收無更張之擾江南錢糧甲於天
下其徵收之法每歲照依奉到

戶部會計派單坐定州縣額數劄府轉行各屬照
則徵收並無逐年分派之例先該本職叨任河南
糧儲道知該省及山西陝西等處亦每歲照派定
倉口徵解守為成規今詢本省父老胥云分派原

非舊例事屬繁擾無益政體但近年以來奉到部單歲取委州縣正官數員帶領書筭數拾名在省磨筭分派累月方完填註由帖分發各府又委官分派壹次方行州縣責之積書又各細派花戶相沿襲訛歲以爲常其在省員役供用所費不下百金在各府則每屬取解書手貳名工食貳兩計陸府壹百肆處又有參百餘兩之費在各州縣則每社人戶催募書筭暗行會斂尤難數計糜費誠不貲矣况倉口無定攤派由人州縣類多引災告輕而委官遷就因以低昂其間奸猾率多用賄求減而積書一弄得以上下其手滋弊誠無已也且徵

收各有限期及時自可完報今夏稅延至秋後未徵秋糧延至年終未比民間所收食費垂盡徒煩筮楚輸納不前積逋之源類由於此及木職推原每歲委官分派之竟始以部單糧數倉口折價歲有增減必須逐年壹次分派方可均平乎不知倉口輕重有增亦有減查得自嘉靖四十年以至於今計拾年之內部單坐到夏秋貳糧止共增銀柒千貳百柒拾餘兩減銀則共壹萬貳千伍百餘兩以拾年而推之以後年分槩可知矣若以所減酌補所增之數大約多寡本不相懸而每年分派勞擾之費復倍過之甚至滋弊無窮失時致逋極爲

各省行稿
未便本職首詢徵糧民瘼莫切于此相應申明舊例以定賦法合候呈詳允日斷自隆慶伍年爲始查照原額或以隆慶肆年無有災傷年分各屬派定倉口爲率以後年分照依奉到部單之數將已經派定倉口行令陸府轉行所屬州縣遵依律限徵收再不必委官來省分派中間部單倉口如無增減照額徵解若減多增少則扣留多者解司備補下次所增之數若減少增多在本年分則從本司呈請堪動官銀酌處以後年分則以節年扣留之數酌補遇有某州縣災傷輕則呈司轉詳兩院酌量處恤重則奏

請定奪其各屬原編有派糧書算工食及歷城縣供給委官書算銀兩仍照數查出解貯作正或備年來增補之數以寬民力如此有陸利馬上之徵收有定法無委官勞擾之費下之辦納有定守無增減科派之害壹也各屬倉口稅糧俱有定數家喻戶曉人人周知各能磨算里胥不得隱漏那移以肆欺騙貳也逐年解戶熟識倉口自便徵解叁也或遇災傷無攤派隣邑之擾肆也所屬掌印管糧官按期催科無守候派單違限之愆伍也稅法有常衆志自定政體畫一上下相安陸也夫政屬便民則要之經久可行法之因革在較其利害之多寡

而決此法一定仍大出顯明告示徧諭軍民人等知悉似爲民便但事屬通省賦法頗重合無批行本司會同按都二司再加酌議停妥呈詳以便遵守惟復將有定奪合咨本司煩爲轉呈施行等因准此今將前項緣由理合具呈伏乞
照詳施行呈蒙

欽差巡撫都察院梁

批一州一縣錢糧各有常數斯

百姓不惑弊端可絕列省成規較然可質山東每歲一派州縣官吏不能預知百姓不能數計以致奸豪用賄行私買輕避重弊端百出告訐難理其合用紙張書算工食騷及全省又不與也且每派

一番動經數月催徵後期自是難完民苦而莫之訴官累而不知其由况坐單增減每歲不過數百兩何必紛更全省計其所派之利不勝所擾之害又誰思之良可太息據議查定倉口以後不必再派極爲東上要政其稱坐單或減多則扣留貯司或增多則本司奏補一二年後扣留積多專備湊補及遇有災傷酌呈別處具見周懇該司經濟遠猷良用嘉服仰會同各司再加詳議報奪繳該本司會同三司遵照集議妥當覆呈蒙
兩院批允遵依派定倉口徵解施行
一爲審編均徭事照得山東均徭貳年壹次審編關

各州行
卷一
五
係民生休戚最切近蒙

本院軫念民艱屢頒案示壹備攷則定擬門丁銀兩壹諭加則不加差以安衆志俱通行各屬查照審編甚盛惠也但審編之法必先筭該州縣銀力貳差數目然後審戶酌量照目編僉斯得適均蓋差目猶之題目也審戶編僉猶之文章也照題行文乃爲體貼今本司訪得所屬審編委官多不行先查筭原坐去本州縣銀力貳差通用銀若干輒自先行審戶直待審完方纔查筭編差未免多寡失均多者未免餘剩少者必至遞加其餘剩者尚可扣留作正而徭戶已多出矣遞加者則輕重

失平均非民便相應酌議合無候呈允日傳行各道行令州縣審編委官除已審編完者候下次遵行外其未審編者速令各官務要先查筭坐去該州縣銀力貳差共該用銀若干然後審戶酌量陸擦上上戶若干戶該門丁銀若干上中至下上各若干戶該門丁銀各若干下中下下若干戶該門丁銀各若干總筭通融務合原坐去銀力貳差之數不得任意加減用滋弊端仍行各州縣以後年分遇審編之期俱要查照遵行如此則徭役均平官民兩便矣緣係將編均徭事理本司未敢專擅擬合呈詳爲此今將前項緣由并似呈書冊理合

具呈伏乞

照詳施行於隆慶四年十一月二十日具呈

欽差巡撫都察院梁 批中三則至下則審註門丁數
多斯所編差銀槩縣均得其平歷城安丘章丘曲
阜之審編是也所以各則門丁銀差比之原額均
獲遞減百姓甘服各縣間有審註下中下門丁
太多以爲可干百姓之譽矣及編銀差時及致上
七則遞加太重大較皆先無成筭故也據議先筭
後審先審後編最是均徑要法真可爲委官準式
依擬速行繳

浙江等處提刑按察司監軍僉事徐 爲官兵奮
勇殺賊致獲全捷事准江西按察司關據經歷司
案呈蒙

巡按江西監察御史段 案驗嘉靖四十一年二
月二十日奉

都察院巡按江西二千五百九十六號勘劄前事
准兵部咨該本部題職方清吏司案呈奉本部送
兵科抄出巡撫江西燕理軍務右副都御史胡松
題嘉靖四十年十月十二日據江西布政使司分
守湖東道右叅議楊守魯呈據原委廣信所千戶
秦邦伯報稱在於貴溪縣火燒嶺把截哨探流賊

在本縣地名彭家坂統兵與賊交鋒殺死賊徒三十餘名斬獲頭目首級一顆奪獲青旗一面馬一匹槍七根本月二十四日又據本道呈報各賊先於鉛山地名湖坊屯掠聞知大兵將至復屯地名上坊就經催督廣信府同知王時拱南昌衛指揮楊郡等同浙江遊擊張弼各領兵由貴溪路又催浙江叅將戚繼光統兵由弋陽路俱約於二十一日一齊進攻上坊賊巢本日黎明戚兵先至上坊直衝賊營用鳥銃打死賊徒甚多屍遍堆疊本日卯時指揮楊郡等俱至山口只見前賊敗潰漫山逃奔遁各該官兵分哨四山搜勦指揮楊郡同

知王時拱遊擊張弼千戶秦邦伯劉添榮龔綸上饒縣典史吳文魁貴溪縣典史夏宗禮鉛山縣典史周仁卿鉛山所千戶劉昇柘楊寨巡檢徐松千總黃奇報効生員何良翰等各官兵斬獲流賊首級一十九顆生擒賊從王坤等三十六名奪獲紙甲鎗刀把箭旗帽器械衣服共三十五件角帶一條奪回被虜男婦七名口并據浙江按察司監兵僉事徐棧呈報奉總督浙直軍門行委監統叅將戚繼光通判吳成器各部兵士到於廣信府據報流賊移巢上坊隨該本道與戚繼光計議進兵機宜以賊衆流突貴溪弋陽鉛山三縣滋蔓爲害貴

溪已有分守叅議楊守魯督兵鎮壓原路其鉛山縣分調義士余廷法王朝用帶領衢兵前去把截湖坊溫陽嶺等處斷賊侵突大路又行該縣調集鄉兵於雙港地方遙張旗幟揚設疑兵用防奔突當於十月二十日監督各官兵進勦探得賊穴外有馬鞍山峻嶺爲之隔絕又有金鷄高峯爲之遠瞭兼之路道崎嶇草木叢茂近巢四圍皆疊嶺重山我兵欲進二十里外已爲瞭見攻之甚難且初屯板橋江蕪一聞我兵入境卽移巢上坊亦以其險足恃也必須乘夜衝枚直抵其巢庶乎神速有濟乃先以衢兵余廷法等把截鉛山遙爲聲勢以

前營把總胡守仁哨官朱文林郭植樓大有陳應朝部兵從石母嶺進以嚴州所千戶胡宗周報効義士陳詩史沈經督之左營署把總吳惟忠哨官陳文遠婁集金鳴亮景良忠右營把總陳大成哨官陳子鑾王如龍童子明陳京部兵從雷打石進以報効軍人金應祥報効高尚節義士杜元府張鳳吏陳力督之本道同感叅將白督把總胡大受哨官朱九龍楊文通婁子和陳祿及中軍把總陳濠哨官張元勳王輔孫廷賢趙記褚應宿各部兵從雷打石抄路徑入巢內通判吳成器下把總石青十五哨官楊英駱嵩七十二唐錦林付業周子

賓莊士和裘良用所部親兵即以通判吳成器親率當先以報効吏吳元道沈廷美武生徐福領陣亦從雷打石而進督餉同知周贊弋陽縣知縣陳仕親帶兵快協同助陣本日二更即銜枚分投至賊巢比因各路險阻草木遮蔽夜中難辨路遠之兵未及刻期而把總陳大成下前哨哨官陳子鑾先以部兵二百餘人挺入賊巢當賊知覺有當先首賊一人手執大旗統領衆賊一齊奮戰該把總陳大成哨官陳子鑾王如龍童子明陳京分哨哨官陳蚕劉武八十二百總錢國明部兵陳洪陳文彥等即首衝其鋒我兵遵令高叫被擄脇從平

民俱許卸甲棄戈散走當陣擄去者數百餘人於是一鼓而斬獲前執旗頭目首級及奪大旗一面各賊愈加死戰隨該把總吳惟忠胡守仁胡大受陳濠分路統兵俱至督率部兵併力用命奮勇衝戰賊方披靡肆散奔上高嶺我兵直追上山自五鼓戰至午時五次鏖鋒俱該把總胡守仁胡大受吳惟忠陳濠哨兵郭植朱九龍金鳴亮等及分哨哨官方奇揚魁戚子明王龍顯八兵夫妻虎婁聰吳六九陳鳳陳子美金魚楊貴吳順王二董得貴王英等及通判吳成器下把總石青十五哨官楊英等各先追殺一十五里賊俱按伏山林我兵方

收賊又出戰戰敗又入山林當陣擒斬爲首廣賊
福賊并從賊首級約有六百餘名顆因本道原令
不許當陣斬級恐致爭功失悞軍機俱聽戰完割
取隨後取級之時其在高山茂草崖壑之內者日
暮不能遍尋止割取有一百九十八顆責令生擒
右賊金潤生等認得渠魁賊首偽稱大總二大王
三總大王四總李大王哨總張旗頭等賊頭首級
四顆餘夥賊首級一百九十四顆生擒從賊一百
九十名審係廣東福建人氏并獲賊巢偽職姓名
單簿二本二件偽票九張及咒符禽術陰陽等兵
書三本祭旗咒一本當陣釋放本地方男婦楊六

八方氏等八百餘名口奪回被擄男婦吳華李十
五等七十八名口廣刀一百二十把福刀九十八
把大旗八面小佛狼機一座鳥銃連三銃共七把
鐵釘鎗筧共一十二根大廣帽金線盜各一頂紅
纓一箇銅鐵錫器一百七十斤賊營牛馬騾畜一
百餘頭轎三十乘其火攻巢內焚死不出燬壞不
堪取級者不知其數緣各兵月夜疾馳廢寢食已
二日且潛趨六十餘里又值日暮是以不能窮搜
仍卽督令追擊俱各慌奔遁竄雲際嶺福建過界
去訖是役也把總陳大成哨官陳子鑾王如龍童
子明陳京分哨官陳蚕劉武八十二各衝鋒冒險

用寡擊衆挺身交戰力挫賊鋒厥功最奇所當首
叙把總吳惟忠胡守仁胡大受陳濠石青十五哨
官婁集陳文遠景良忠金鳴亮朱文林郭植樓大
有陳應朝朱九龍婁子和陳祿楊文通張元勳王
輔趙記孫廷賢楊英駱嵩七十二唐錦林付業周
子賓莊仕和裘良用或用火攻而蕩燼其巢穴或
設伏兵而邀擊於間道此功當併叙者也嚴州所
千戶胡宗周報效高尚節陳詩沈經杜元府陳力
王道武生褚應宿及別事問發吳松所克軍金應
祥報效吏吳元徐福沈美舍人鍾萬寶或家丁或
親手或督陣或哨探均有臨敵斬獲之功各懷戮

力奮勇之義所當次叙者也哨隊兵夫陳洪等
力爭先衝鋒陷敵所當出格叙錄者也其報效武
生義士醫生等項張圮沈楷張鳳王來王米紀大
選金彥文皆效忠宣勞于陣前功又其次者也及
照叅將戚繼光膽畧超群而三軍用命紀律整肅
而一鼓成擒出奇以攻其無備使賊巢頓破多方
以尾其後驅俾餘孽盡掃此則功勞最著尤當首
叙通判吳成器意氣孚結乎志沉毅素閑乎韜畧
躬冒矢石而鏖戰當前督率家兵而奮擊恐後所
其効勞功亦居最桐鄉縣縣丞程廷楷管理擣賞
倫著勤勞亦宜併錄貴溪縣署印同知王時拱臨

江府同知周贊署玉山縣印推官姚篚弋陽縣知縣陳仕鉛山縣知縣史應嶽或分兵拒守共成犄角之勢或督餉協謀均效決勝之猷此則功當併叙而同知王時拱親歷戎行不辭危險知縣陳仕嚴加保障殫竭心力且鄉兵皆有斬獲功尤最著者也其陣亡哨兵胡文忠潘廷龍吳大立隊長吳清廿七陳子器陳子信蔣文華董金清等皆臨敵血戰奮不顧身應候照例加恤見獲頭目賊衆首級合候紀驗明白照例給賞本日又據江西按察司整飭贛州兵備兼分巡嶺北道副使陳柯呈稱奉臣并南贛提督軍務右副都御史陸穩行委馳

劉寧都調發贛州衛指揮斯言慎百戶嚴威秦邦爵寧都縣主簿徐昂統領龍南興國贛縣寧都雩都各兵在於宜黃縣地名廖坊於二十七日進兵用烏鏡打死穿紅賊首一名穿白大旗手二名突有西邊山腰亂石礮木如雨各兵退屯又於二十八日辰時再進鏖戰賊敗前後共殺死賊徒二百三十餘人斬獲首級二十九顆并小功本日天晚收兵餘賊遁往南豐地方本晚指揮斯言慎分兵四路埋伏次日寅時各賊果然奔遁衆兵舉號衝賊陣腰首尾不顧殺死賊黨一百餘徒斬獲首級四十四顆各等因到臣并解各首級前來據此卷

各省行稱
查先據貴溪鉛山宜黃等縣申報流賊侵掠該臣
行委各道及浙江監兵僉事徐棡參將戚繼光各
統兵勦殺去後今據前因除行各道將首級轉解
巡按衙門紀驗及動支官糧并奪獲贓物牛馬羸
畜器械等項犒賞外各該獲功兵士符呪禽術法
書總單貯庫被擄人口審明釋放生擒各賊監候
問招外照得閩廣之盜賊如水惠廣其源汀邵其
匯而淮瀉於江西之湖東先於八九月間撫建之
墟彌漫潰決橫溢旁流仰仗

天威 玄祐尋就殲逐地方遂爾平定已經具本
題報外然其徒甚繁其黨甚衆此去則彼又來西

而東忽出近十月間又賊一夥忽從邵武光澤等
處突入貴溪鉛山宜黃等處又該臣調遣前項官
兵攻勦會浙江參將戚繼光通領浙兵入境星夜
催促甫至弋陽賊不知大兵俱已齊集仍前迎敵
被各官兵奮勇鏖戰大致克捷此真

皇上 聖靈神武震疊遠近將士祗承恭奉不敢退縮
之所致也爲照浙江統兵參將戚繼光千里赴援
刻日成功號令嚴明而部校莫不用命威稜震耀
而盜賊因之褫魂竈疊如林秋毫無犯居民按堵
行旅揚眉監兵僉事徐棡才猷明達縉畧深沉探
勝筭於幄中同心共濟運玄機於掌上早夜齊驅

倚馬揮毫聞鷄撫劍之二臣者所當優加賞賚以酬其功仍各紀籍並候超擢浙江紹興府通判吳成器協恭敬事夙夜効勤廣信府同知王時拱探報明實防守周慎賊不能逸良亦賴之把總陳濠石青十五陳大成哨官陳子鑿等荷擔始釋即躬赴戰多所斬獲尤冠諸軍俱應一體量賞以酬其勞其南昌衛指揮楊郡贛州衛指揮斯言慎廣信所千戶秦邦伯鉛山所千戶劉昇并冠帶千戶劉添榮龔綸贛州衛百戶嚴威秦邦爵寧都縣主簿徐昂上饒縣典史吳文魁貴溪縣典史夏宗禮鉛山縣典史周仁卿柘楊巡檢司巡檢徐松報効生員何良翰等各能奮勇俱有斬獲但事于人衆且非出於同時容臣備細分別差等犒賞以作其氣庶後可用焉至於總督胡宗憲心切安民才優善將指畫發縱沉幾數語之間揮霍飛揚決勝千里之外軍書相望於道唯欲赴機探騎不絕於郵遂已破賊尤當查臣先題併行優賚或賜勅獎勵以侈其績庶乎

天語皇言金聲玉振海內傳誦盜賊知悚而地方生靈可免後患餘殃矣等因奉

聖旨兵部看了來說欽此又該巡按江西監察御史段顧言題爲劇盜得志群寇乘風地方雖暫小安兵

威仍未大振懇乞聖旨再飭督撫諸臣奉將天討
以靖西南久患事臣於本年十月初八日欽奉
勅諭命臣隨軍紀功續於十一月二十一日得見邸報
該兵部題奉

聖旨著臣協計用兵臣欽此欽遵恭奉 綸音不勝感
激不勝惶汗竊念臣自被役江藩夙夜憂皇勉圖
稱塞未能也乃復值寇賊頻驚戎馬交馳兵不息
肩民不安堵郡邑殘破強半瘡痍且害及方面等
官不可數計仰塵 聖明軫念西南更易文武將
吏黜其不職逮其有罪一時大小臣工亦罔不悚
慄奮策於

威靈之下悉謀戮力各思祇事如臣駑鈍謬荷 責成
敢不益竭初心求仰副 任使於萬一臣謹按流
賊叛兵之爲江西害在嶺北湖西湖東三道地方
皆其出沒雲擾之區而南昌屬境亦被波及其間
殺擄焚劫等情已該臣節次具題訖近照大盜皆
飽慾得志而去羣盜乘風者復垂涎効尤種種而
來目前似謂稍寧爲害尚無底止况根株不拔常
爾伺隙渠魁未靖而前讐終不可雪也使不大彰
天討以蕩平之則亦奚異於揚湯止沸之喻哉臣
請先以前後賊情及各官功罪上陳次及猖獗不
靖之源推避釀成之釁以求蕩定之策可焉何以

謂大盜得志而去除贛之三巢已不俟言矣自本年閏五月初三日一夥三千餘由贛州羊角水堡經興國過萬安直寇泰和地方殺副使以及指揮千戶等官延任流劫共計月餘仍由興國大肆焚劫而去一夥二千餘亦自興國經冠吉安之永豐一夥一千五百餘傍石城瑞金一帶攻據東山壩突過廣昌寇樂安轉自樂安趨永豐與前賊合夥攻城又趨新淦攻城又趨清江之永市鎮其二邑之未破者特幾希耳延任流劫共計五十餘日仍各由舊路而去一夥自南豐而入徑寇宜黃攻崇仁復轉宜黃在崇仁則破敗東西二者宜黃之城

雖兩攻未破而千煙大姓則已去十之四五矣延任流劫計半月餘由南豐舊路而去後於七月十四日又被叛兵袁三等破廣信之玉山永豐二縣偏肆搜劫延任四十一日自分水關斬關而去以上數起俱大掠財貨婦女飽欲而長往者曾未少挫其鋒不謂之得志而何哉其各該有罪等官已經題奉

欽依回籍任俸拏解提問處分訖何以謂群盜聞風而來以湖西言之自前賊去後六月二十七日隨有一夥五百餘由崇義寇龍泉衝劫萬安泰和永新廬陵地方直至新淦之河均始被官兵撲殺潰走

擒斬王祿等計二百餘名是役也僉事盧岐嶷頗稱有功焉八月十八日又有一夥三千餘由興國徑寇泰和轉萬安焚劫百嘉等處復轉廬陵富田地方南贛軍門行令副使陳柯督調官兵合戰二次擒斬二百餘名而守備任鑾頗稱有功力戰身亡賊即遁去陳副使雖又督兵追至興國擒斬一百餘名然賊首未獲大勢猶在功罪僅相當耳以湖東言之目前賊去後於八月初四日有賊萬餘人突從廣昌分夥而來一夥八千餘直破樂安一夥三千餘破宜黃一夥三千餘破崇仁各縣治其時署印官樂安則王簿田膏崇仁則縣丞劉廷

屋宜黃則縣丞王元仁俱抱印先逃則罪將何辭八月二十七日寇宜黃夥內分出千餘人流劫豐城之烏峯嶺突至臨江之樟樹鎮該臣牌行盧僉事督領調到各官兵共一千名趨豐城因而夜襲其營挑戰殺走擒賊賴天祐等共一百五十餘名內殺死林四係賊首旗頭生擒葉子清則總督陳朝用則禽師也餘賊遂潰返宜黃諸賊聞之各離縣治在樂安者移劄臨川之上頓在宜黃者移劄臨川之青泥在崇仁者劄移臨川之永豐渡三面犄角俱逼近撫城而撫城甚危官兵出與兩戰俱失利領兵都司帶管守備事務王瑞在陣先逃都

司段以鳳亦隨左次千戶李瓊因而被害自是守
巡府縣愈成縮首未幾東鄉金谿南城之處處處被
寇又分百餘徒流劫進賢界之雲溪渡而進賢告
急臣又牌行督糧叅議王詠帶領千戶張相等官
兵五百餘名趨進賢相機勦禦陸續亦有擒殺賊
遂退回舊營于時適巡撫胡松自浙赴任而來帶
有浙兵千餘名至進賢徑趨撫州而撫圍遂解分
兵追逐賊飽載始由南豐廣昌而去延任流劫共
五十餘日其間樟樹一捷僉事盧岐嶷實有大功
而群賊遂歸則巡撫胡松震疊先聲之所致也左
叅議王詠亦微有勞績焉其有罪都司王瑞已奉

明旨拏解段以鳳已經革俸分守楊守魯分巡李正葵
及知府陳元琰等已經任俸署印王簿田膏縣丞
王元仁劉廷星則法當提問而死事李瓊所當照
例優卹者也當撫賊未退時有九月二十日有賊
一夥納一千餘徒入寇建昌之南豐逼近南城殺
死領兵檢校劉秉仁其典史朱文亦被殺傷不數
日而死一夥一千餘屯劫南豐之十五都石油一
夥一千餘入寇新城之樟村俱漸過南城境內隨
該都御史胡松轉趨建昌督行各道并都司等官
分投領兵勦禦而賊聞退走其窺伺於境上未入
者報稱亦有數千皆引去焉十月十三日又報一

夥一千餘徒入寇宜黃廖坊地方即南豐轉來之賊也未幾聞兵仍退去計屯劫半月有餘而欲逞之心猶未厭焉是役也檢校劉秉仁等孤兵死事併應欽卹十月初五日一夥三千餘而自火燒嶺入寇弋陽貴溪鉛山之間該巡撫胡都御史方行分守楊叅議督兵往救而總督軍門兵部尚書胡宗憲遣發浙兵三千名迨至其處即該領兵叅將戚繼光督兵僉事徐斌會同本省官兵分地攻勦殺賊一百九十八名擒獲一十五名賊遂潰逃復轉建寧地方又於十一月初一日由杉關突入新城南城地方尋又兼程入宜黃縣治焚燬陰陽學

并南北二閣太平閣及民房百餘家隨移屯宜黃塘地方該臣與撫臣俱檄戚叅將并守巡該道楊叅議等主客官兵奮勦賊始遯去是役也戚繼光僉事徐斌功應首錄而叅議楊守魯亦與効有勞助焉以上各賊復羨慕前賊而來者其在撫屬一大夥尤爲得志則其聞風而起何隙而逞者又何限哉臣惟閩廣二省之間大盜紛起而閩廣之程鄉和平大埔等縣閩之汀漳延邵等府俱與江西之境界相連徑路相通而有名賊首俱歷歷可指節據福建汀漳遣兵備僉事金淵揭稱程鄉縣松源橋下賊首蕭應金陳九自五月十一日率衆三

千自武平象洞出會昌林朝曦亦松源橋下賊首
率衆三千自上杭來蘇入武平與陳九等合夥出
廣昌石城松源奇坑賊首何琪五月三十日率衆
八百自象洞又會昌入程鄉老口上舉賊梁益謝
世剛伍月二十二日率衆二千自安遠武平界首
亦至會昌俱與陳九等合夥分哨寇江西地方其
先次在太和戕殺江副使等官及破崇仁攻宜黃
劫樂安攻永豐攻新淦焚永市者即此也後據贛
州兵備副使陳柯報據泰和獲賊王橋供稱賊首
姚在峯見得陳九梁益等得利而回亦率衆三千
自廣寇吉安其戕殺守備任鑿者即此起也又據

帶管分巡南昌道僉事盧岐嶷報稱樟樹獲葉子
青供稱賊首陳奇徐東周林逢曦與殺死林四等
因先次在江西俱得利復率衆新獲一萬餘人衝
入撫州地方其破三縣縣治流劫各縣地方及殺
千戶李瓊者即此起也又據浙江督兵僉事徐棧
報據宜黃地方獲賊雷機陳進供稱清流縣賊首
黎天明與弟黎天崗約會大帽山賊首劉相與被
殺周金公糾合上杭清流邵武等縣賊徒約有七
千餘人來寇弋陽貴溪鉛山三縣之間蓋聞袁三
等之風而興起者也它如大埔木窖賊首張璉黃
沙壩賊首涂玉簡程鄉合夥清流上杭等處賊首

黃飛雲節據季副使李僉事報稱俱垂涎江西而未入者其叛賊袁三與其黨姚伏三張必勝李必勝則自廣信出福建之崇安浦城浙江之龍泉等處盤旋流劫猶未已也切照群盜既各有姓名巢址堪憑非若鬼神霆電之坐宜閃爍不可揣摩方物者亦可憚而不即加勦滅哉大都在江西止以出境爲幸既無能窮追直擣以絕其再寇之心在閩廣又各以推避爲常來也不加阻遏去也不施邀擊任朝東暮西日新月盛若浪遊無人之墟者則雄莫黯醜安得不愈肆其跳梁之志也哉臣所謂釀釁滋奸而猖獗不靖者其此之由也臣嘗不

勝憤憤謹有千慮之愚爲

陛下陳之竊惟羣盜雖衆黨皆散處猶人一身頭目四肢之各異也然其聲勢相倚臭味相通又若血脉周流於四體然者今之殺人者豈必編四體而刃之哉亦惟致命緊要處加之力而已是故或刺其心或砍其首或斷其一手一足皆足以死人今靖盜者亦豈必巢巢而戮之人人而誅之然後方然成武功哉亦惟於可乘可襲處加之意而已是故破一巢黨則諸黨自應褫魄殲一渠魁而脇從自當斂迹于是

天威布昭之後除殺副使破城池有名賊首務在成擒

外其餘應招應討相機施行將見賊亦人也一散
即之爲百姓矣世豈有執迷不反怙終不悛而樂
爲悖逆之徒者哉不然若止以待外夷之法待之
來則僅禦去則不追而仍坐視其猖熾臣恐腹心
肘腋與窮荒瀚海者不同而江西之患臣固不知
其所終也然是舉也又豈江西一省之兵力可能
哉伏望

皇上先將前項有功官員盧岐嶷等量加

賞賚有罪主簿田膏等提究處分死事任鑾等查照恤
錄仍乞

大語叮嚀申嚴四省督撫諸臣同心共力訂約興師早

圖大舉抑或以四省道路相去甚遠爲會頗難彼
此不相節制臨時不無爽期如蒙

勅下兵部議復廣兵自某月日某處進閩兵自某月日
某處進南贛之兵自某月日進江西浙江之兵作
何赴援防遏各分定以

欽限不許違誤而江西南贛地方仍容臣隨軍督察不
分主客官兵但有不用命者悉聽令臣糾劾專寧
之日一併分別功罪具實上

請庶使事有責成人無退避庸功可奏而地方亦可寧
矣等因奉

聖旨兵部知道欽此欽遵抄出送司卷查先該巡撫江

西右副都御史胡松題爲主客官兵奮勇勦逐大
夥流賊地方平定乞

賜陞賞褒錄優恤事該本部議將獲功人員陞賞覆奉
聖旨這流賊退散地方稍寧各官獲功還著巡按御史
覈實具 奏陞賞劉秉仁林文贈廕依擬鄭剪六
量贈一官楊守魯等照不及例調用段以鳳革任
欽此又該巡按江西御史段顧言題爲急補守備
員缺并乞查例錄卹及

嚴飭督撫諸臣恪遵 明旨早除賊患以保民命事
該本部覆奉

欽依將守備任鑾千戶李瓊各贈廕襲陞二級俱經

行欽遵外今該前因通查案呈到部看得巡撫江
西右副都御史胡松題稱本年十月內閩廣流賊
忽從邵武地方突入貴溪鉛山宜黃等處官兵攻
勦大致克捷及稱浙江叅將戚繼光監兵僉事徐
棡所當優賞通判吳成器同知王時拱把總陳濠
石青十五陳大成哨官陳子鑾等所當量賞指揮
楊郡斯言慎千戶秦邦伯劉昇劉添榮龔綸百戶
嚴威秦邦爵王簿徐昂典史吳文魁夏宗禮周仁
卿巡檢徐松報効生員何良翰所當犒賞及又稱
總督浙直尚書胡宗憲尤當優賚或

賜勅獎勵又該巡按江西御史段顧言題稱江西前後

賊情各官功罪及猖獗不靖之原與夫蕩平之策
乞要先將有功僉事盧岐疑徐斌副使陳柯叅議
楊守魯王詠叅將戚繼光重賞有罪主簿田膏縣
丞劉廷屋王元仁提問死事守備任鑾千戶李瓊
檢校劉秉仁典史林文恤錄仍要申嚴四省督撫
諸臣約會進兵各定

以限不許違悞事寧具奏各一節除任鑾李瓊劉秉仁
林文優恤楊守魯改調無容別議外爲照江右地
方逼隣閩廣巢賊入秋以來屢犯建撫廣信等處
各該地方等官前後斬獲之功雖有可錄特來驛
騷之患尚爲未已在巡撫都御史胡松則止論戚

繼光等擒斬之功在巡按御史段顧言則備言四
省進勦之策段顧言又欲將有功人員先行賞賚
卽今用兵之際事干激勸相應通行議擬合候

命下將胡宗憲胡松段顧言重加賞賚盧岐疑徐斌戚
繼光同加賞賚陳柯王詠吳成器王時拱陳濠石
青十五陳大成陳子鑾量加賞賚楊郡斯言慎秦
邦伯劉昇劉添榮龔綸嚴威秦邦爵徐昂吳文魁
夏宗禮周仁卿徐松何良翰等巡撫衙門分別犒
賞田膏劉廷屋王元仁巡按御史提問具奏本部
一面馬上差人賚文交與總督浙直江西尚書胡
宗憲提督兩廣侍郎張臬巡撫福建都御史游震

德巡撫江西都御史胡松提督南贛都御史陸穩
務要同心協力糾會停當廣兵開南贛兵俱限明
年二月各酌量以害處所相機進勦江西浙江發
兵應援防邊各以巡按御史務遵

欽依內事理隨時紀驗如有推避違悞即便指名查叅
以憑究治至寧山日有功有罪人員徑自分別具
奏事在闕外應繼應撫并未盡事宜悉聽彼中劑
量停當本部不口遙制等因嘉靖四十年十二月

二十六日少保兼太子太保本部尚書楊博等具
題本月二十八日奉

聖旨是胡宗憲胡松段顧言各賞銀三十兩紵絲二表

襄廬岐嶷徐斌戚繼光各二十兩一表襄陳柯等
各十五兩楊郡等巡撫衙門分別犒勞田膏等巡
按御史提了問各省會兵進勦事宜各該督撫官
計儀停當協力舉行務在寇賊盡絕地方寧靖如
或推諉誤事著胡宗憲及各該紀功巡按御史叅
奏治罪欽此欽遵抄捧送司案呈到部擬合通行
爲此合咨前去煩爲轉行巡按江西福建廣東各
監察御史查照本部題奉

欽依內事理欽遵施行等因到院准此擬合通行爲此
合行劄仰本職依奉查照施行等因奉此擬合就
行爲此仰司抄案呈堂照依劄案備奉

各省行補
欽依內事理即便轉呈各督撫衙門并守巡監軍道一體查照等因備關前去煩請欽遵查照施行

刻滇臺行稿後序

滇故屬荒徼不繩以中國治無論往昔即我

明輻輳之廣遠軼三代然因土襲宜實而不賦役而不庸雖例置藩臬聞司而柄歸鎮府諸夷酋落俯首皈命惟該鎮是聽而沐氏自黔寧王拓宇定疆世受重寄亦惟二三子孫篤忠步武為能奉

天子之寵威以救寧其民人狃狃熙熙號
稱簡易矣顧勢重而偏祿久而侈群小
又從而播弄於其間自嘉靖以來諸夷
部長承襲有例謁見有儀歲時有獻與
夫峒處窟歲之氓不苦於庄租則阨於
場貨又其甚者朝受一牒暮破數家莫
之控訴而援植之財詘而力殄民劫於
積威官怵於隱禍嗚呼滇之為滇其可

稱易簡哉其可復易簡為哉當其時今
大中丞徐公兩官其地為藩臬大僚日
規規焉條處件畫凡所以裁其權而甦
省斯土者如不及也然一令一禁靡不
稱引

國制陰折默奪而終之以保護之真心以
故令甲既申觀聽移心志一驕者戢而
蠹者誅豈特滇之民無疆惟休而沐氏

實免於無疆之恤矣昔者晏嬰為齊抑
陳氏也曰惟禮可以已之今讀公諸文
告牒檄言事事殊然令不同要曰法當
如是禁不同要曰法不得如是故人見
彼媿赧懾伏謂

國家威令故然而不知公所以操持而節
制之者誠有以服其心也涑不敏竊因
是仰見公用意之深而存體之大如此

云抑諸夷積習謂向昔為當然今乃灼
知

國家懷柔本意即卉服烏言之衆靡不嚮
順益堅治且與中國埒而後之官是土
者取是編讀之如臨保傳又得以免於
冥行拂經之患然則斯刻也其可已耶
萬曆元年夏五月

賜進士出身江西按察司按察使四明柴

海國圖志

卷五

涑頓首譔



